

**Aalisarneq pillugu Inatsisartut inatsisaata
allanngortinneqarnera pillugu Inatsisartut inatsisaat
(Siunertanut aalajangersaanernut aalajangersakkanik
allannguuteqartitsineq, allaffissornikkut
aqutsinermut siunertanut, kisitseqqissaarnermut
siunertanut aamma nakkutilliinermut siunertanut
atatillugu paasissutissiisussaataaneq, aalisarnermi
misissuisartut ilanngunneqarnerat kiisalu atuisut
akiliuteqartalernissaannik atuutsitsilerneq)**

§ 1.

Aalisarneq pillugu inatsit nr. 18, 31. oktober 1996-imeersumi imaattunik allannguuteqartitsisoqarpoq:

1. § 2, imm. 2 imatut oqaasertaqassaaq:

Imm. 2. Inatsisip matuma atortinnerani aalisagaqartuarnissaa kinguaassiortuarnissaallu pingaartinneqassapput, kiisalu aalisarnerup uumassusillit aaqqissugaanerannut sunniuteqarnera naammaginnartuutinneqarnissaa. Aammattaaq aaqqissuulluakkamik ukiullu qanoq ilinera apeqquataatillugu uumasunik ilisimatuut nalinginnaasumik siunnersuinerat naapertorlugu pitsaanerpaamik iluaquteqarnissaa kiisalu inuiaqatigiit allamut saassinnaanernut pisariaqartitsineq pingaartinneqassapput.

2. § 14, imm. 5 nutaatut ikkunneqassaaq:

“Naalakkersuisut sinerissap qanittuani aalisarnermi aalisarsinnaanermut akuersissutinik tunniussinermut kiisalu akuersissutinik allanik tunniussinermut atatillugu akiliuteqarnissamik piunasaqarsinnaapput, annertussusissaat aalisarsinnaanermut akuersissutinik tunniussinermut akuersissuteqartarnermullu atatillugu allaffissornermut aningaasartuutit tunngavigalugit aalajangersarneqartunik. Taamaattorli sinerissap qanittuani raajarniarnermut akuersissutinut akiliisoqartassanngilaq.”

3. § 14, imm. 6 nutaatut ikkunneqassaaq:

“Akiliutit § 14, imm. 5-imi taaneqartut aningaasartassai Inatsisartut aningaasanut inatsisaatigut aalajangersarneqassapput.”

4. § 14, imm. 7 nutaatut ikkunneqassaaq:

“Suliffeqarfiit (inuit, ingerlatseqatigiiffiit, umiarsuaatileqatigiit ilaallu ilanngullugit), avataasiorluni imaluunniit sinerissamut qanittumi raajarniarnissamut Naalakkersuisunit akuersissuteqarfigineqarsimasut

akuersissutinit ukiumoortumik nunatta karsianut akileraaruteqartassapput. Akileraarut akilersinniarneqartassaaq aalisarnikkut suliniuteqarnernik nakkutilliinermut aningaasartuutunik matussusiinissaq siunertaralugu.”

5. § 14, imm. 8 nutaatut ikkunneqassaaq:

“Aalisagartassiissutinit akuersissuteqarnermut akileraarut, § 14, imm. 7 naapertorlugu, Inatsisartut aningaasanut inatsisaatigut aalajangersarneqassaaq.”

6. § 14, imm. 9 nutaatut ikkunneqassaaq:

“§ 14, imm. 7 malillugu akileraarutinit akiliuteqartitsinermut allaffissorneq pillugu Naalakkersuisut nalunaarutitigut erseqqinnerusumik maleruagassiorsinnaapput, taamatullu atuisunik akiliuteqartitsineq § 14 imm. 5 naapertorlugu.”

7. § 14 imm. 10 nutaatut ikkunneqassaaq:

“Najoqqutassiani una inatsit naapertorlugu atuutilersinneqartuni, najoqqutassiani aalajangersakkanik unioqqutitsinermi akiliisitsinermik pineqaatissiineq pillugu maleruagassiortoqarsinnaavoq.

Ingerlatseqatigiiffiit aktiaateqarluni ingerlatseqatigiiffiusut, piginneqataassuteqarluni ingerlatseqatigiiffiusut, piginneqatigiiffiit (Amba), peqatigiiffiit, suliffeqarfiit imminnut ingerlattut aamma aningaasaateqarfiit aalajangersakkanik unioqqutitsinermi akiliisitaasussanngortinneqarsinnaapput.”

8. Kapitali 10-mut kapitalip qulequtaa imaalillugu allanngortinneqarpoq “Naalakkersuisut paasissutissanik pissarsiniarnerat”

9. § 25, imm. 1 imatut oqaasertaqassaaq:

“Inatsisartut inatsisaata aqutsinikkut atornerarnerani, tassunga ilanngullugit naatsorsueqqissaarnermik misissueqqissaarnermillu siunertanut atornerani, aamma nakkutilliinermik siunertanut atornerani, Naalakkersuisut malittarisassanik aalajangersaasinnaapput, tamatuma kingorna kalaallit aalisariutaannik piginnittuusoq, atugassaqaartorluunniit, inatsimmi § 6, imm. 1 naapertorlugu, nunat allamiut aalisariutaat, inatsimmi § 7, imm. 1 naapertorlugu, Kalaallit Nunaanni tunisassiorfiit ilaalu ilanngullugit angallatit pillugit, sakkut atortullu allat, aalisarnek, pisat, angallammut allamut nuussinerit, angallammi nammineq tunisassiornek, usingiaanerni tunisinermilu isertitat ilaalu ilanngullugit pillugit paasissutissiinissaminut pisussaatinneqarpoq. Tassunga ilanngullugit teknikkimut, aningaasaqarnermut ingerlatsinermullu paasissutissanut tunngasut.”

10. § 25, imm. 2 imatut oqaasertaqassaaq:

“Naalakkersuisut imm. 1 naapertorlugu naatsorsueqqissaarnermi paasissutissanik pisortatigoortumik saqqummiussisinnaapput aamma Inatsisartut inatsisaat naapertorlugu akuersissutit tunniunneqartut kisitsisinngorlugit paasissutissanik imaluunniit tamanna tunngavigalugu malittarisassat aalajangersarneqarsimasut pillugit.”

11. § 29, imm. 1 imatut oqaasertaqassaaq:

“Kalaallit Nunaanni Aalisarsinnaanermut Akuersissutinit Nakkutilliisoqarfik eqqartuussivimmiit uppersarsaammik peqanngikkaluarlutik uppersarsaatitulli atuussinnaasumik takutitsinikkut § 6, imm. 1 naapertorlugu kalaallit aalisariutaannik piginnittumut, atugassaqaartitaasumulluunniit peqqusisinnaapput, inatsimmi § 7, imm. 1 naapertorlugu, Kalaallit Nunaanni Aalisarsinnaanermut Akuersissutinit Nakkutilliisoqarfimmiit aalisarnermi nakkutilliisumik ilaasoqassasoq, aalisariutip aalisarnerani nakkutilliinissaq siunertaralugu.”

12. § 29, imm. 1, nr. 1 nutaatut ikkunneqassaaq:

1) “Kalaallit Nunaata nunataani aalisarnikkullu killeqarfiata oqartussaaffigisaani.”

13. § 29, imm. 1, nr. 2 nutaatut una ikkunneqassaaq:

2) "Kalaallit Nunaata nunataani aalisarnikkullu oqartussaaffigisaata avataani, ingerlatat taakkua angallatinit Naalakkersuisut tunniussaannik akuersissummik pigisalinnit imaluunniit Naalakkersuisut akuerisaannik akuersissummik pigisalinnit ingerlanneqarpata."

14. § 29, imm. 2 imatut oqaasertaqassaaq:

"Kalaallit Nunaanni Aalisarsinnaanermut Akuersissutininik Nakkutilliisoqarfik eqqartuussivimmiit uppersarsaammik peqanngikkaluarluni uppersarsaatitut atorsinnaasumik takutitsinikkut angallatit akuersitissinnaavai, Kalaallit Nunaanni Aalisarsinnaanermut Akuersissutininik Nakkutilliisoqarfimmeersumik angallatit pineqartut Kalaallit Nunaannut tulaassineranni nakkutilliisoqarnissaannik aamma umiarsuarnut allanut nuussinerni Kalaallit Nunaata aalisarnikkut oqartussaaffigisaani aamma angallatit kalaallit nunaanneersut aalisarnikkut oqartussaaffiusup avataani umiarsuarmut allanut nuussineranni."

15. § 29, imm. 3 imatut oqaasertaqassaaq:

"Umiarsuaatileqatigiiffup pineqartup Kalaallit Nunaanni Aalisarsinnaanermut Akuersissutininik Nakkutilliisoqarfimmeersup nakkutilliinermut atatillugu nakkutilliisup angallammiinnera nerisaqarneralu akilertassavai. Nakkutilliinermut atatillugu aningaasartuutitut umiarsuaatileqatigiiffup annertunerusumik matussuseeqataasinnaaneranut malittarisassiornissamut Naalakkersuisut aalajangersaasinnaapput."

16. § 29, imm. 4 imatut oqaasertaqassaaq:

"Aalisarnermik nakkutilliisut angallatip inuttai piumaffigisinnaavai, aalisarnermik nakkutilliisut angallatip radioanik, qarasaasiaanik oqarasuaataanillu atuinnissamut periarfissaqarnissaminnik nakkutilliinerminnut atatillugu oqartussaasunut attuumassutilinnut attaveqarniarnerminni."

17. § 29, imm. 5 nutaatut una ikkunneqassaaq:

"Aalisarnermik nakkutilliisut imaluunniit Kalaallit Nunaanni Aalisarsinnaanermut Akuersissutininik Nakkutilliisoqarfimmiit nakkutilliiartortunut imm. 1 aamma imm. 2 naapertorlugit, pisinnaatitaaffinnik sulissanillu Naalakkersuisut aalajangersaasin-naapput. Inatsisartut inatsisaat malillugu inatsimmilu malittarisassani aalajangersakkat malinneqarnissaannut suliasat nakkutilliinermik ilaqarpata, naalagaaffimmi oqartussaasut oqaloqatigereernerisigut suliasat aalajangersarneqassapput."

§ 2.

Inatsisartut inatsisaat 1. januar 2010-mi atuutilersinneqassaaq.

Kalaallit Nunaanni Namminersorlutik Oqartussat, 3. december 2009

Kuupik Kleist

/

Ane Hansen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut